



N 21/5429
20/09/2022

5429-21-2-202209201154



შპს „გია_2019“-ს

მის: თეთრიწყაროს მუცნიციპალიტეტი, ს. ბორბალო
ელ.ფოსტა: varsimashviligia39@gmail.com

სსიპ გარემოს ეროვნულმა სააგენტომ განიხილა თქვენი 2022 წლის 6 ივლისის გარემოსდაცვითი გადაწყვეტილების მიღების მიზნით წარმოდგენილი N2940 განცხადება, რომელიც ეხება ქ. რუსთავში შპს „გია_2019“-ის ცემენტის წარმოების საამქროს ექსპლუატაციის პირობების ცვლილებას და გაცნობებთ შემდეგს:

- გზმ-ის ანგარიშში წარმოდგენილი ატმოსფერულ ჰაერში გაფრქვევის გამოთვლები ჩატარებულია დაბინძურების 12 წყაროსათვის და მათში არ არის გათვალისწინებული მტვრის გამოყოფა კაზმის მომზადების პროცესში, კაზმის მოსამზადებელ მოედანზე. ამავე დროს გზმ-ის ანგარიშში აღნიშნულია, რომ „საწყობიდან ნედლეული (კლინკერი, თაბაშირი და მინერალური დანამატი) დადგენილი რეცეპტის შესაბამისად ავტომტვირთავის საშუალებით, გადაიტანება ბეტონის მოედანზე და აირევა“. კაზმის მომზადების პროცესში წარმოშობილმა მტვერმა კი შეიძლება გამოიწვიოს დაბინძურების დონის მცირე მატება. შესაბამისად, აღნიშნული საკითხი საჭიროებს დაზუსტებას;
- დოკუმენტში აგრეთვე აღნიშნულია, რომ „ცემენტის დაფქვის არსებული წისქვილისათვის, ასევე ახალი დასამონტაჟებელი წისქვილისათვის, შერჩეულია **ორსაფეხურიანი** მტვერდამჭერი სისტემა, ციკლონი და სახელოებიანი ფილტრები“, რაც წინააღმდეგობაში მოდის დოკუმენტის მე-7 თავში წარმოდგენილ ინფორმაციასთან, სადაც აღნიშნულია, რომ „ცემენტის სეპარატიული საფქვავე წისქვილი აღჭურვილი იქნება ეფექტური აირგამწმენდი სამსაფეხურიანი სისტემით: I საფეხური - დამლექი კამერა 10 %-იანი ეფექტურობით, II საფეხური - ციკლონი (ლოკოკინა) 70 %-იანი ეფექტურობით, რომლის დიამეტრია 1.2 მ, სიმაღლე 2.4 მ და III - სახელოებიანი ფილტრები 99.9 %-იანი ეფექტურობით“. გზმ-ის ანგარიშში - ტექნოლოგიურ სქემასა და ნახაზებში არაა განხილული „ციკლონის“ არსებობა და მდებარეობა. ხაზგასმულია და ნაჩვენებია მხოლოდ სახელოებიანი ფილტრები. ამასთან, გაფრქვევის ანგარიშში გ-2 წყაროდან (საპროექტო წისქვილი) გაფრქვევის გამოთვლისას გათვალისწინებულია დამლექი კამერა. შესაბამისად, დეტალურ დაზუსტებას საჭიროებს ზემოაღნიშნული საკითხები და არსებულ და საპროექტო წისქვილებზე გათვალისწინებული მტვერდამჭერი

სისტემები, ხოლო გაფრქვევების ანგარიში საჭიროებს შესაბამის კორექტირებას. ამასთან, წარმოდგენილი უნდა იყოს შესაბამისი საპასპორტო მონაცემები (სახელმწიფო ენაზე);

- პროგრამა „ეკოლოგ-3“-ით ჩატარებულ გამოთვლებში გაფრქვევის წყარო - გ-1-ის სიმაღლე და გამონაფრქვევის ტემპერატურა არის შესაბამისად 14 მ და 90°C. გაცნობებით, რომ ზემოაღნიშნული საწარმოს 2021 წლის გზშ-ის ანგარიშში, იმავე წყაროს (5 ტ წარმადობის წისქვილი) აღნიშნული პარამეტრები არის 9 მ და 60°C. შესაბამისად, დაზუსტებას საჭიროებს ზემოაღნიშნული პარამეტრების მნიშვნელობები;
- გზშ-ის ანგარიშის თანახმად, ატმოსფერულ ჰაერში მავნე ნივთიერებათა გაბნევის გამოთვლებისას გათვალისწინებულია საწარმოს ახლოს მდებარე შპს „ჰაიდელბერგცემენტჯორჯიას“ ცემენტის საწარმოს გაფრქვევები და ფონური დაბინძურება ქ. რუსთავის მოსახლეობის მიხედვით. თუმცა, საწარმოს მიმდებარე ტერიტორია წარმოადგენს ეკოლოგიურად დატვირთულ ინდუსტრიული ზონას და შპს „გია_2019“-დან მოშორებით მდებარეობენ საწარმოები (მაგ. შპს „რუსელოისის“ ფეროშენადნობთა ქარხანა, შპს „მეგა ცემენტი“ ცემენტის საწარმო და სხვა) რომლებიც ახდენენ დამატებით გავლენას ატმოსფერულ ჰაერზე და ზრდიან ფონური დაბინძურების დონეს. ზემოაღნიშნულიდან გამომდინარე და იმის გათვალისწინებით, რომ დოკუმენტში წარმოდგენილი გამოთვლებით მიღებული მტვრის კონცენტრაციები დასახლებული პუნქტის ტერიტორიაზე კრიტიკულად მაღალია (0.98 ზდკ), აღნიშნული საკითხი საჭიროებს დამატებით შესწავლას და შეფასებას და შესაბამისად დამატებითი შემარბილებელი ღონისძიებების წარმოდგენას;
- დოკუმენტში აღნიშნულია, რომ „მავნე ნივთიერებათა მიწისპირა კონცენტრაციების ანგარიშისას კუმულაციურ ზემოქმედებაში გათვალისწინებული იქნება შპს „ჰაიდელბერგცემენტჯორჯიას“ და შპს „სოლოს“ ცემენტის ქარხნიდან გაფრქვევის წყაროები“, თუმცა დოკუმენტში ფონურ წყაროებში გათვალისწინებულია მხოლოდ „ჰაიდელბერგცემენტჯორჯიას“ გაფრქვევის წყაროები. ამასთან, აღწერილი კუმულაციური ზემოქმედება ზოგადია და საჭიროებს დეტალიზაციას კონკრეტულ მაჩვენებლებსა და მონაცემებზე დაყრდნობით;
- ატმოსფერულ ჰაერში მავნე ნივთიერებათა გაბნევის ანგარიშში ფონურ დამაბინძურებლად, როგორც უკვე აღინიშნა გათვალისწინებული არაა შპს „მეგა ცემენტი“. გზშ-ის ანგარიშში წარმოდგენილი შენიშვნების გათვალისწინების ცხრილის თანახმად, „რადგან შპს „მეგა ცემენტი“ არ მდებარეობს უშუალო სიახლოვეს, მისი კუმულაციური ზემოქმედება გათვალისწინებულია ფონურ მაჩვენებლებში ქალაქის მოსახლეობის რიცხოვნობის მიხედვით“, თუმცა, მონაცემების ელექტრონული გადამოწმებით დგინდება, რომ შპს „მეგა ცემენტის“ საწარმოს ტერიტორია ხვდება შპს „გია_2019“-ის საწარმოს 500-მეტრიანი რადიუსის ზონაში. შესაბამისად დაზუსტებას საჭიროებს აღნიშნული საკითხი. ყოველივე ზემოაღნიშნულის გათვალისწინებით, წარმოდგენილი უნდა იყოს სიტუაციური სქემა, აღნიშნული საწარმოების გაფრქვევის წყაროების ჩვენებით და კოორდინატების მითითებით. ამასთან, საწარმოდან 500 მეტრიანი რადიუსის ზონაში მოქცეული საწარმოების გაფრქვევის წყაროებიდან გაფრქვეული მავნე ნივთიერებები, გაბნევის ანგარიშში გათვალისწინებული უნდა იქნას ფონურ მაჩვენებლებად;

- ზემოაღნიშნული საკითხების დაზუსტების გათვალისწინებით, წარმოდგენილი უნდა იყოს კორექტირებული ატმოსფერულ ჰაერში მავნე ნივთიერებათა ზღვრულად დასაშვები გაფრქვევის ნორმების პროექტი;
- დოკუმენტაციაში დაზუსტებას საჭიროებს ჩანაწერი - „საწარმოში ექსპლუატაციის დროს წარმოქმნილი სახიფათო ნარჩენების არასწორი მართვის რისკები, საქმიანობის სპეციფიკიდან გამომდინარე არასახიფათო ნარჩენების (მაკულატურა) წინასწარ დამუშავებასთან დაკავშირებული ტექნოლოგია გარკვეულწილად წარმოდგენს გარემოზე შესაძლო ზემოქმედების წყაროს.“

დანართის სახით გიგზავნით ადმინისტრაციული წარმოების ეტაპზე სამოქალაქო მოძრაობის „გავიგუდეთ“ მიერ, 2022 წლის 22 აგვისტოს სააგენტოში წარმოდგენილ მოსაზრებებს და შენიშვნებს, რომლებიც ეხება ქ. რუსთავში, შპს „გია_2019“-ის ცემენტის წარმოების საამქროს ექსპლუატაციის პირობების ცვლილების გზშ-ის ანგარიშს. გაცნობებთ, რომ სამოქალაქო მოძრაობის „გავიგუდეთ“ მიერ დოკუმენტაციასთან დაკავშირებით გამოთქმული მოსაზრებები ზემოაღნიშნულ საკითხებთან ერთად გათვალისწინებული უნდა იყოს დამატებითი დოკუმენტაციის სააგენტოში წარმოდგენისას.

ასევე კორექტირებას საჭიროებს ცხრილი 1 (საქართველოს გარემოსდაცვითი კანონების ნუსხა) და ცხრილი 2 (გარემოსდაცვითი სტანდარტების ნუსხა), სადაც მოცემულია ძალადაკარგული კანონების/კანონქვემდებარე აქტების ჩამონათვალი. ამასთან ბუნდოვანია როგორც დოკუმენტში გამოყენებულ ცნებათა განმარტებები, ასევე აღნიშნული განმარტებების საჭიროება და მათი საკანონმდებლო საფუძველი. აღნიშნული განმარტებები მოცემულია სხვადასხვა ძალადაკარგული საკანონმდებლო აქტებიდან.

ამასთან, წარმოდგენილი უნდა იყოს დაზუსტებული ინფორმაცია გზშ-ის ანგარიშის მომზადებაში მონაწილე პირის/პირების შესახებ.

გთხოვთ, ორი თვის ვადაში უზრუნველყოთ ყველა ზემოაღნიშნული საკითხის/შენიშვნის შესახებ დამატებითი ინფორმაციის/დოკუმენტაციის წარმოდგენა სააგენტოში. აღნიშნული საკითხების გათვალისწინებით, დაზუსტებული ინფორმაციის/დოკუმენტაციის წარმოდგენამდე სააგენტო მოკლებულია შესაძლებლობას იმსჯელოს გარემოსდაცვითი გადაწყვეტილების გაცემის თაობაზე

თამარ ფიცხელაური

თ. ფიცხელაური

სააგენტოს უფროსი

სსიპ გარემოს ეროვნული სააგენტო

